

OMUKWETU

Registered at the General Post Office as a Newspaper

10c



OMUKWETU OKU NA OMBILIHA UNENE — TIRRONEN A TI

“Omukwetu” gwomumvo gumwe momapandja okuthike pamwe nembo lyomapandja 384. Sigo ongashingeyi — “Omukwetu” oha futwa R2 komumvo, osho omusamane Toivo Tirronen omunyoli gwomambo ngoka a tseyika nawa, a popi komeho gengathithi lyaantu mboka ya li ya kala moshituthi shOmambo nOmisioni, pOlukonda (9-10.7.1977). Okwa tsikile ko ta ti:

Otandi pula: Openi to adha embo lyomapandja 384 tali gu R2 adhike? Aawe, embo lyomapa-ndja 384 otali futwa R7 nenge dhi vule po. Onkee “Omukwetu” oku na ombiliha onene.

Oshifo shika opo sha tsakanitha pehulilo lyomumvo gwa yi oomvula 40. Osha li sha tete- kelwa koshifo edhina lyasho “Osondaha” oku- za 1901 sigo 1933. Omumvo 1937 osha li sha nyanyangidhwa momwaalu 2 000, omumvo 1960 momwaalu 8 000, ihe okuza mpoka o- mwaalu ogwa siluka sigo 5 000, nando aantu oyi indjipala moshilongo.

Ando tu tameke okukondjela oshifo shetu, shi ninge tashi nyanyangidhwa 10 000 nenge o- mwaalu gwongashingeyi lwaali! Oshifo ngele tashi taandele nomwaalu omunene, otashi vulu okuyakula aaleshi nawa shi vule pethimbo lyo- mwaalu omushona.

Tate Tirronen mukupopya kombinga yomupo- ndo gwomambo okwa ti kutya: Omambo oha-

Tala kep. 6

Ohatu mono omanyamukulo mahapu kepulo eli.

Vamwe otava ti: Ongeleka etungo omo ova-nhu hava ongala mOshoondaxa, omo yo omu-fita ha ningile elongelokalunga.

Vamwe otava ti: Ongeleka ongaashi ELOK, ELK, ANGLIKANA, nosho tuu.

Ondi shi shi kutya omanyamukulo aveshe ovo tava nyamukula ngaha osho ve udite ko. Ngeenge hatu lesa Kor.6:19, ohatu mono kutya omu na otembeli oyo i na Omhepo lyapuki yaKalunga. Yo ongeleka pefimbolinya oya li hai ifanwa otembeli.

Omolwaashi inandi dimina pamwe naava tava ti ongeleka etungo; ndele ohai dimine pamwe naava tava ti ongeleka otashi ti "OSHO SHOMWENE", sha dja moshitya shoshingeleka (KURIAKOS-WAT AAN DIE HERE BEHOORT). Hano noshitya shimwe "EUMBO LAKALUNGA".

Jesus eshi e uya moshiwana shOvajuda okwa li ku na eteelo a shikulwe kuvahapu, naashi vahapu inave mu tambula nove mu popya keyayi noku mu sheka, okwa shuna kovahongwa vaye. Ta ningi ehanganano nongudu oyo ye mu itavela notai mu hokolola noye mu tala oye omutungu wongeleka nomuhumbati wouhamba waKalunga. Okwa udanekela ou te mu itavele e mu pe oshitukulwa shouhamba waye, Mat.13:13-20.

Ongeleka kai fi oshinima ngeno ihashi linyenge ndele oshinima shi na omwenyo, osheshi mwene wayo naye oku na omwenyo. Ongeleka oyo oshinima shi na oimati, Omaludi eengeleka di lili nodi lili ongaashi ashike omunhu ta kunu omuma imwe ndele tamu ka dja omutwe umwe u na eemuma dihapu.

Natu taleni oshinima shimwe: Okudja pedipao laStefanus opa holoka elunduluko. Ongeleka eshi ye li fikamena oya hovela nee okukula nokutandavela pamukalo woshilongatumo. Komukalo ou okwa holoka eengeleka pahapu osho yo omaongalo, Gal.1:2.

Ndele nande ongaha ongeleka oi li imwe. Oilyo oi lili noi lili, eengeleka nomaongalo, ndele aishe imwe, osheshi mwene wayo umwe, nokutya Jesus Kristus, Oil.9:31.

Ongeleka oyo ehanganano lovaitaveli, na oyo olutu laKristus. Ye oku li omutwe wayo, Kor.12:12-13. Ongeleka oyo Kristus, Es.4:1-7.

Ongeleka oya tungwa kovakali kokule pamafano avo, ngaashi ovayapostoli, ovaprofeti, ovayevaangeliste, Ef.4:11. Ovalongi yo mongeleka ove li po vahapu ngaashi oinhimbu yolutu, Oil.14:2., Titus 1:5.

Omaudifo nomaindilo osho yo omaimbilo otaa udika mongeleka, Ef.5:19. Omasakramendi otaa ningwa, pakudikwa kwao kuKristus. Eengalo neeshali ohai ulike kutya eongalo oli na omwenyo notali longele Kristus, 1Kor. 16:1-2.

Ongeleka kai fi ekuma longaho, ndele oyo Kristus mwene, naau te mu longele nokwe mu itavela oye oku li mongeleka, kape na mbudi owongeleka ilipi ile owomeitavelo li lipi, shima ashike a itavela Jesus Kristus kutya oye omona waKalunga nOmukulili wounyuni.

Ombelewangeleka ya Elok, mokulesha Omukwetu gweti 30 Juli 1977, oya dhimbulula mo iinima yimwe mbyoka ya tseyithwa pombambo, onkene otayi pukulula ngeyi:

Pashifo shOMUKWETU shonomola 14 sheti 30 Juli 1977 kepanja eti 4 koho yoshipalanyolo OMATSEYITHO GAMWE, mokatopolwa konomola yotango omu na okuleshwa ngeyi:

1. Omusitagongalo M. Ngipandulua ngoka e na ombelewa ye yaayakuligongalo mOngwediva, ngaashi wo omuwilikingeleka K. Dumeni, ngoka wo egumbo lye li li mOngwediva, opwa uthwa oyo ya kale manga nesiloshimpwiyu lyOMBELEWA YETUMO ndjoka wo yi li mOngwediva, sigo Epangelongeleka lya mono notali utha ngoka ta taamba ewiliko lyoshilongatumo nolyombelewa ndjika.

2. (a) Efupipiko lyedhina lyOngeleka Onkwa-
evangeli paLuther yomOwambokavango inali
lunduluka; oli na okukala ELOK/ELOC,
ngaashi lyi igililwa.

OMUKWETU ota gandja ombili omolwomaseyitho ngano gopombambo ga taandelithwa, unene tuu kiilyo yOngeleka ya Elok mbyoka ya gumwa nayi kushika. Ombili, ombili, ombili. — Omukwetu.

EHANGANOMBIBELI LA PANDULA

Mombelewa yOiniwe ya ELOK omwa yakulwa mafiku aa onhumwafo ya dja kuhamushanga wEhanganombibeli laSouth Africa.

Onhumwafo otoi pandula ekwafo loimaliwa oyo ongeleka yetu ye i tumina kEhanganombibeli, i ka kwafe melundululo lOmbibeli. Hamushanga okwa pula omudiinini wemona la ELOK: kutya oimaliwa i fike apa oya ongelwa pamukalo ulipi, ye a fikife yo omapandulo Ehanganombibeli koilyo aishe yongeleka.

(Oimaliwa ei ndishi oyo yo hai ongelwa maongalo aeshe a ELOK mokuumba ongalo, ngaashi hashi ingidwa komufita kutya ongalo yonena oyokEhanganombibeli. Hano yodula ya dja ko aishe kumwe oya li nee R905,10)

"Neudo otu na omalundululo Ombibeli momalaka 20 notashi pula omuvalu u fike R160 000. Eshi otashi ulike nghee oilonga ei ya fikama po komayambidido eengeleka, osho ombilive ya twikila.

Elalakano letu okufikifa Ondjovo yaKalunga kukeshe umwe melaka laye. Eshi oshilonga tashi twikile eedula dihapu, ndele ondjabi yasho oinene. Oshiholelwa: Odula ya ya Ovaswazi ova mona omushangwa muyapuki wotete melaka lavo, Evaangeli laMarkus. Ovanhu ova landa omambo atano ile omulongo ile omilongo nhano nokuli, nova tameka okulesha divadiva. Apa opo pe na ondjabi ikumwifa. Kalunga ota popi," osho onhumwafo ya ti.

Mokukalamwenyo kwetu kombanda yeve tse aakritse otu na omalalakano gopaali. Lyokulongela olutu nolyokulongela omwenyo. Nolwindji ohatu uvu uudhigu omolwonkalo yetu.

Omusamane nenge omumati ngele a mono oluhepo talu idhenge megumbo, ota laleke, opo a ye kUushimba. Notashi vulika ta pulwa kukuume ke a tegelele ya dhane oshituthi shontumba, ihe ota tindi. linima oyindji tayi vulu ando okwiimba omuntu a ye kUushimba, ihe sho a hala okwoopaleka onkalo ye yokomeho, ota thigi po ayihe e ta yi kUushimba.

Omulumentu gwaKalunga ota yi kOndangwa kokaholo. Mpoka ta lala pevi; sikulimwe okwe ya nokuli nokambiga kokuteleka nokashako kuusila, opo a kale ha teleke ye a tegelele ngaa okaholo.

Ngele okaholo ka tameke, nena ou shi kutya omuntu nguka haye awike a hala kUushimba, omathelenomathele ge ya. Nena otaa tameke okuthiminika nokuundulathana yu uka koshipala shafolomana. Kehe gumwe ota ulike ombapila ye yiilonga.

Nena Folomana ota tameke okudhenga aantu, opo ya shune monima. Epokolo nande li kale tali imbi ngiini, omulumentu oko wala a uka. Oshilalakanenwa osho tuu shika a keelele egumbo lye kondjala nokonkayi.

Ngele pu kale uudhigu u thike peni omulongi nguka oti idhidhimikile uudhigu auhe. A ningwa ngeyi, a tilwe ngeyi, okwa dhiginina ngaa iilonga ye. Shaa ngaa ta mono po okashona ke nande inaka gwana. Oti itsu omukumo, kutya "Okalya kandjala ke ku fala ke loolo," ngaashi omukulugwonale a tile. Okwa sa ohoni okulaleka, oshoka kegumbo aantu itaa ke mu tala nomeho omawanawa. Ye okwa hala wo ngaa egumbo lye li kale lya fa omagumbo gaalumentlu ooyakwawo.

Esiloshimpwiyu etiyali oloyo ndyoka hali ithanwa lyopambepo. Aakriste yopethimbo ndika otaa ipyakidhile niinima yokukalamwenyo kwopayuni.

Kalunga okwa hala unene twi ipyakidhile niinima mbyoka itaayi hulu po. Oshoka Jesus ota ti, "Inamu ilikolela omaliko gopevi ngoka taga yakwa po kaafuthi nokulika kooshushi nokoothithi, ihe ilikoleleni eliko lyomegulu, ndyoka ihaali yakwa po kaafuthi. Inamu sa oshimpwiyu mu lye shike nenge mu zale shike."

Ota tsikile ta ti: Egulu nevi otayi hulu po ihe oohapu dhandje itadhi hulu po. Kaleni mwi ilongekidha, oshoka kamu shi esiku Omuwa gweni te ya, ote ya ngolwaadhi kegulu. "Eimbito limwe otali ti:" Lungameni inamu pwila mo mounyuni omo tamu hange omahewa oo tae ke mu pukifa shili." Yakwetu, ondjila yaKalunga nayo wo otayi pula epupyu lyomoshipala, hakaholo ashike.

Omukriste omukwetu, ngoye ou li mondjila yini? Oondjoka yopalutu nenge oyopambepo? Ou uvite tuu ewi lyaKalunga sho tali ku popitha unene tuu mboka tu li mUushimba? Owi ikolelela mo tuu mondjila ndjoka u li? Otayi ku fala tuu komwenyo gwaaluhe nenge omekano? Dhiladhila nawa okuza nena Kalunga ote ku kongo.

TU GALIKANENI TU TYE. Kalunga, otse aantu yoye aanandjo. Ota indile u patulule omakutsi getu gokomwenyo, opo tu dhimbulule ondjjila ndjoka tayi fala komwenyo gwaaluhe, oshoka ongoye ondjila tayi fala komwenyo gwaaluhe. Amen.

D.M. Nduuvundika

OMAGONGALO OMAPE GA THANEKWA

Okangundulongekidho ketoto lyomagongalo omape moshitayingeleka shOndonga oka gandja omathaneko getoto lyomagongalo omape gatatu koshigongi shoshitayingeleka numvo.

Onankali moongamba dhegongalo lyaNyayanya muuzilo wOndonga, Uukwiyuushona moongamba dhomagongalo Olukonda nEheke mUumbugantu wOndonga nOmwandigwontala moongamba dhomagongalo: Okaku, Oshitayi nOhalushu. Ogo omahala taga tengenekelwa omagongalo omape. Omathaneko ngaka oga taambwa koshigongi.

Okangundulongekidho ketoto lyomagongalo omape moshitayingeleka shika, oka dhikilwe 1972. Omapegongalo ngashi Epembe nElombe, agehe muuzilo wOndonga nOnamukulo, oga zi unene miiyimati yiilonga yokangundu hoka.

Kakele kokutala mpoka pwa pumbiwa etoto lyegongalo, okangundu haka ka thikama mii-lyo ihamano moka mu na wo nomutonateli-shitayingeleka shoka, ohaka tala wo nokupukulula omagongalo ga kwathe aakwanegongalo mboka haa kala moongamba dhomagongalo gaashi gaandjawa.

Mpoka pu na aakwanegongalo ya tya ngeyi, ya pukululwe, opo ya tembukile momagongalo ngoka ge li popepi nayo, ya adhike komayakulo gopausita nuupu.

Nonando oshigongi shoshitayingeleka osha taamba ngomuntu gumwe omathaneko gokangundu, kombinga yetoto lyomagongalo, epulo limwe olya thigala po natango inaa li mona eyamukulo, kutya aasita otaya ka za peni okulitha omagongalo ngaka.

Etegameno eshona lyowala li li po omolwaa-longwasita mboka ye li mEngela ya tegelelwa ya pite omumvo tagu ya.

Aayenda ayehe oya landula ongundu yaapolosi tayi ende kashona yo tayi hiki omankuma. Ihe omaimbilo agehe ngoka taa imbi ogaNakambale. Oshe tu pula oomminute 30, okudhingoloka, twa lamba aapolosi manga ego ngalo li li konima.



Eyambulopo neithikamenoinekelo oya kwa li iitsa yopakati moshipopwiwa shomunambelwa papangelo, omusamane Nicolaus Maro gwaTanzania.

Otwa hiti mongeleka. Elongelokalunga olya ningwa — oondjimbo odhi imbwa pamalufu gaagundjuka naapolosi. Uulalelo Uuyapuki owa topolwa. Pethimbo lyokutopola opwa ningwa oshinima oshikumithi sho sha fuula ndje — inandi shi mona nale.

Omumbisofi ngoka a ningi elongelokalunga okwi igidha ngeyi: — methimbo ndyoka shaa ngoka oto gandja Uulalelo Uuyapuki kumukweni, ngoka mwe egamathana naye nokutumbula: "Olutu lwOmuwa lwe ku hepekelwa. Ombinzi yOmuwa ye ku tilahlilwa. Shaa ngoka longitha elaka lyoye'."

Petata lyontiheyali otwa piti mo. Lyo elandulathano otali ti kutya ontiheyali otwa tegelelwa kombala (kegumbo lyepangelo). Kombala otwa yakulwa nawa komalutu. Omaudhano noondjimbo dhoshigwana oya li ya longekidhwa nawa. Omupresidende Nyerere okwe ya mokati ketu nokuholola enyanyu sho twa thiki megumbo lye.

Esiku lya landula otwa tsikile oshigongi she-tu. Moshigongi omwa kala tamu longithwa o-malaka gane: Oshiswahili, Oshindowishi, Oshilingilisa nOshifulanisa.

Oshigongi ohashi tamekithwa nowandaha. Konima yowandaha ohaku konakonwa otundimbibeli muungundu. Mongundu nenge muungundu mbuka omo hamu kala ekonakono nomapulo ge na sha notekisti ndjoka ya leshwa mowandaha. Oohapu ndhoka dha kala hadhi leshwa mowandaha yongula nenge mootundimbibeli odha kuthwa mOntumwafo yaPaulus ya nyolelwa Aaroma.

Oshipalanyolo shoshigongi osha kwatela mo iikundathanwa ayihe ya li ya kundathanwa: uuthemba womuntu, okatongotongo, uukumwe

wongeleka, uuthikepamwe waalumentu naakii-ntu miilonga yongeleka, oshilongatumo neuvi-tho lyevaangeli. Kombinga yuuthemba womuntu neshundulo lye, oshigongi osha tala kutya omukalo nguka kagu na nando ekwatathano nepistoli lyoKaaroma.

Ganwe gomomatompelo goshigongi kombinga yuuthemba womuntu oga li ngeyi: "Tse otwa pewa ompito ndjika kOmushiti gwetu, okwe tu shiti aantu ye, oshifetha she, 1 Mos.1:27. Pa-Mbimbeli kaku na nando ogumwe a pewa onkondo kuKalunga dhokushundula nenge okukutha po uuthemba womuntu, 1 Mos.4:10;9:6. Kalunga sho a shiti omuntu, okwe mu tula wo megameno lye. Ayihe oyi li meutho nomegameneno lyaKalunga, Iil.17:25-26. Miilongo mbyoka mu na ooveta dhokatongotongo, omo wo tamu holoka omatondathano nomangwandjagulathano, ngoka taga fala sigo metiko lyombinzi."

Moshigongi omwa holoka omawi gaatiligane mboka ya zimine uusama wawo yene, sho inaaya tya sha komapangelo gawo; unene tuu mboka ye na omahangano gokupindika mu SWA/Namibia. Pahapu dhawo oye wete sha puka.

Osha puka unene kombinga yuundjambi uushona mboka hau longelwa kaantu yetu momahangano gawo. Kombinga onkwawo oye shi tala kutya kashi shi shopakriste, ngele omukriste ta gongala miigongi yopakriste, ta taamba uulalelo uuyapuki, manga ye mwene ini iyapula, ye ini idhilika okushundula nokuthindila pevi omuntu omukwawo — sigo omukalo nguka aantu ye gu pe edhina kutya: "OKalunga a pitika aantu ya kale ngaaka kombanda ye-vi."



Gumwe gwomaapopi ya simana moshigongi, okwa li omumbisofi Helmut Class gwoku-Würtemberg.



Omundohotola William Lazareth okwa popi oshindji koshinakugwanithwa shongeleka pankalathano nopaupolotika.

Mpaka otapu holoka epulo lyu ukilila moongeleka, ngele otadhi vulu tuu okwiigameka kwaamboka ye li moothina: ya shundulwa noya kuthwa omauthemba gawo. Ombimbeli otayi tu pe eyamukulo lya yela. MEtestamendi Ekulu otamu holoka omatompelo ge na sha nemanguluko lyomuntu. Uuna omuntu e na uuthemba we oku na okukala a manguluka komuntu omukwawo.

Tu taleni omuhunganeki Jesaja sho ta ti, kutya Kalunga okwe mu longitha mokumangulula oshigwana she, muupika waBabel, Jes.61:1-2. MEtestamendi Epe otamu popiwa wo emanguluko lyomuntu. Omuntu ngele okwa manguluka koondjo dhe, nena oku na ekwathano naKalunga.

Omuyapostoli Paulus ota hokolola iinima iyali: ohole nemanguluko, Gal.5:13-15. Pahapu ndhika oongeleka odhi na ompito yokupopila mboka ye li moothina nokuholola komapangelo oshipango shaJesus shohole.

Oshigongi osha ningi eindilo lya kwata miiti kiilyo yasho, kutya iilyongeleka nomapangelo, unene kUumbugantu waAfrika, yi dhimbulukwe yo yi tseyithe kutya omakankameno nomulandu gwelongo lyaLuther otagu popile ekalekopo lyuuthemba womuntu.

Moshiwike shahugunina omuwiliki okwa ningi eindilo kiilyo, opo yi galikane Kalunga a gandje omuwiliki gwOngongahangano, ngoka e na okutaamba oshimpwiyu oshinene muule womimvo heyali tadhi landula.

Meti 24 IyaJuni 1977 ehogololo olya ningwa. Omumbisofi Omutanania, Josiah M. Kibira oye twa pewa kuKalunga, a kale omuwiliki peha lyomuprofesor Mikko Juva.

"Hane mwe shi ningi ihe ehalo lyaKalunga lya longo mune. Otandi taamba oshilonga shika, mwe shi inekelele ndje," osho omumbisofi Kibira a popi konima yehogololo lye.

Mewilikongundu lyomumbisofi Kibira omwa hogololelwa wo iilyo yimwe yaaheshi aasitagongalo. Osho ngaaka Kalunga ta longitha ayehe mepya lye. Oohapu dhe nadhi kale dhu udhilila mutse, sigo te ya.

AALANGE YE TU PE OSHIHOLELWA

OKUGANDJA KWAAKRISTE MARK.12:41-44

Moohapu dha tumbulwa pombanda otatu mono oshiholelwa oshivanawa shokugandja iitimulongo yomomaliko getu kuKalunga. O-lwindji oyendji itaa ipula kutya oolye ya tegelelwa ya gandje oshitumulongo shomiiliko-lwa yawo kuKalunga.

Yamwe otaa tala, kutya ngiika aalongi, aapani, aanambelewa mboka ye na oondjambi oonene, aasita, aevaangeliste, aadiakoni nenge oomboka haa kwatele momagala. Osho tuu shono? Luk.21:1-4. Okugandjela Kalunga oshitumulongo osho oshinakugwanithwa shomuntu kehe. 2Kor.8:8-12.

Okugandja okwo epandulo okupandula Kalunga ngoka a gandja tango, e tu pe tu likole, ngashi kehe gumwe e na eliko lye. Ha koonkondo dhetu yene twa likola, ihe otwa likolithwa kuTate Omushiti gwetu.

Aalange oye tu pe oshiholelwa

Momumvo 1976 mOmbelewa yiiniwe ya ELOC omwa taambwa iitimulongo ya zi kaamwameme yoku C.D.M. Oya li ya gandja R828.00 naamboka ya gandja oyo:- J. Nepolo, Johannes Martin, Hafeni Titus, A. Kambonde, Josef Johannes, Johannes Sakeus, Paulus Uutoni, Nuuyoma Iyambo, Jonas Tomas, Simeon Nauyoma, Sakeus Mikka, Lukas Stefanus, Salatiel Endjala, Metusalem Hamata, Malakia lipinge Oiva Anguwo, Jeremia Johannes Shiimi nooyakwawo yalwe.

Ehwamo lyaamwameme yokokawe onkene tali tsikile komeho, nomumvo 1977 otwa taamba ishewe iitimulongo kumbaka ye li ko, ngaashi taa landula mpaka:-

Leonard Shapota	R30.00
Vilho Mateus	20.00
Eino Amutenya	30.00
Filemon Timoteus	30.00
Makili	10.00
Gottfried Micha	30.00
A. Shipanga	20.00
David Kleopas	30.00
	R200.00

Ashihe otatu shi pandulile Kalunga, ngashi e tu pa Omwana ngoka a sile oondjo dhetu na shika okwe shi tu ningile omagano omolwohole ye.

Tangi kune amuhe mboka mwi igandjele okulongela Omuwa nomaliko geni. Omwe tu penduthile oshiholelwa oshivanawa. Tse otu na ehalelo ewanawa kune, opo Kalunga ngoka e mu pe nokwe mu likolitha a yambeke iilonga yeni nomalutu noomwenyo dheni ne ina mu dhimbwa oku mu indila, opo e mu gwedhele ko natango.

Otandi mu kundu Fil.1:3

S.W. Hekandjo

ga palutha omwenyo gwomuntu, ihe otage gu palutha ngiini? Osuuka ontoye mokana, ihe ito vulu okukala nawa, ngele to li ashike osuuka. Olutu lwomuntu otalu pumbwa sha shilwe. Osuuka italu yi pumbwa nande. Ito si, nando u kale itoo li nando osuuka. Ngele to pewa onguthi, oto si, nando oya fa ngaa oshipalutha.

Osho shi li wo kombinga yomambo. Membo kehe to li lesa, otamu zi sha shoka tashi kanyatele momwenyo gwoye, uuwanawa nenge uuwinayi nenge uuzigo nokuli.

Ngiika oto pula: omolwashike omambo taga kunu uuwinayi, go taga holokithwa? Eyamukulo olyo ndika: omoluuwinayi mboka u li muuyuni mbuka. Aanyanyangidhi yamwe otaa ikongele eliko lyimaliwa momambo omawinayi, oshoka oyendji oya hokwa oku ga lesa. Omambo otaga vulu okunyolwa wo owina okupukitha aantu e taga landwa nombiliha nenge otaga gandjwa osima. Ongaashi Omuyapostoli Paulus ta kumagidha ta ti:

"... Inamu itaala ayehe mboka taa ti kutya oye na ombepo yaKalunga, ihe ya konakone ni mu tale kutya ombepo ndjoka ye yi na ngele oyaKalunga tuu, (1 Joh.4-1) osho omambo ge na okukonakonwa nawa kutya ogo mbepo yini.

Konima yomimvo 20 maalongwa yandje omwa li mboka ya li ya tala kutya embo kehe oli shi kwiinkelwa ngaashi Ombimbeli nenge okatekisa. Ngashingeyi ondi inekela, aantu ayehe oya kotoka nokuli moshinima shika, oshoka oshili oyi li muJesus Kristus awike, hamambo ga nyolwa kaantu.

Muuyuni wongashingeyi uukriste otawu pewa olwindji uusama kutya owo omutondi gwemukomeho notawu hanagula po uukwatya wi ilile woshigwana. Mokulesha Ombimbeli otu wete mbala kutya epuko kali li muukriste, shila omumboka taye u kondjele.

Nando otu na oradio, nando oradio yomuzizimba ngiika nayo wo otayi holoka esiku limwe, nando otatu vulu okupungula omawu moongalo nenge momapaya, kape na shoka shi vule embo.

Omawu taga zi moradio, otaga piti po ashike mokathimbo; ito ga dhimbulukwa we nuupu. Osho omafano taga ulikwa mokino. Ihe embo lyoye ihali yi ontuku. Aluhe oli li pungoye. Oto vulu okulesha mo nombili, ito pumbwa okweendelela. Oto vulu okulesha moshikando shimwe kashona nenge oshindji. Oto vulu okuhogolola ethimbo lyoye, uuna wa hala okulesha. Oto vulu okweendulula okulesha kwoye, ngaashi wa hala.

Embo otali longo wo omuntu okudhiladhila. Aantu mboka haa lesa oshindji, otaa ndjanga pambepe. Momavi ogendji omwa dhimbululwa kutya aanasikola mboka taa longwa pamikalo ndhoka itaa pumbwa okwiileshela, otaa si uu nye pambepe. Iilonga nomadheulo gopalutu ohaga koleke oontumba molutu. Okulesha ohaku koleke uuluyi okudhiladhila.

Osha li sha tseyika nokuli nale nokuli muIsraeli kutya oohapu dha popiwa ohadhi dhimbiwa nuupu. Onkee odhi na okukala dha nyolwa. Kalunga sho a gandja ipango ye omulongo, omumati gwe Moses okwa popitha oshigwana medhina lyaKalunga a ti:

"Oohapu ndhoka tandi dhi ku pe nena ndjika, dhi na okukala momwenyo gwoye. Naamwoye u na oku dhi ya longa noku dhi ya hokololela noku dhi nyolela miikulo yomweelo gwegumbo lyoye nomuuyanda." (Deut.6:6,7a, 9) Osho wo Kalunga okwa lombwele omuhunge neki Habakuk:

"Nyola nawa miipelende yeloya uundanda wa tonata emoniko ndyoka tandi li ku hololele, o po li vule okulesha nuupu. Li nyola, oshoka ethimbo lyokutsakanithwa kwemoniko inali thikana manga." (Hab.2:2,3a).

Miinyolwa iinima ohayi pungulwa ethimbo ele, yi wape okulesha nokudhimbulukiwa ethimbo kehe.

Nandi endulule wo mpaka shoka sha tumbulwa "mOmukwetu" kombinga yokulesha: "Okulesha okwo epya ihaali theta. Okulesha inaku fa ehokololo to li hokololelwa owala kokana pethimbo ndyoka, nomuhokololi gwalyo e ta yi.

"Ano okulesha kaku shi oongano ndhoka hadhi tsuwa pohungi uusiku, ihe okwo oshinima moka to likola mo uuyamba wopaali: ano welaka lyo lyene, u mone omulyo gwalyo, oshitiyali uuyamba waashoka to lesa, o po shi ku tunge, ngele to lesa iileshomwa iiwanawa mbyo tayi vulu oku ku tunga."

Omambo itaga vulu okuholoka pwaa na oshinyanyangidho. Oshinyanyangidho kombinga yasho itashi vulu okulonga pwaa na mboka taa ilandele iinyanyangidhwa yasho. Sho tu na oshinyanyangidho shetu sha ELOK, natu shi kolekeni, tu ilandele iinyanyangidhwa yasho, o po shi wape okuholokitha aluhe iinyanyangidhwa iipe. Ote dhiladhila wo mpaka oshifo "shOmukwetu," osho tatekulu Tirronen a ti.

Adolf Shidiwe a ya ketulumuko

Omushamane Adolf Shidiwe omukokoli omutivali meongalo Endola. Okwa pita mOseminali mOniipa, 1926. Tete a kala omuhongi wofikola manga ina pita mOseminali, modula 1917. Opo nee eshi a pita mOseminali e uya mOnanghulo (1918), omukunda womEndola. Fiyo eongalo la totwa po (1925) komushamane Simson Shituwa.

Adolf okwa dalwa 1878 nokwa shashwa 1913. Okwa kala omulongi eedula 61. Paife okwa dimbulwa a ye ketulumuko lovana vaKalunga eti 12.6.1977. Okwa fiya ko oludalo laye lihapu lomuKristus nande ina pewa lopambelela.

Okwa fiya po omukulukadi waye aeke. Ova kala naye eedula 59. Nde naye ke na oukolele. Kalunga na yambidide omufiyekadi waye.

Andreas Mungungu

PANDULWA

Epangelo laSouth Africa ola vilikila kutya omushamane Van der Walt, ngoloneya wa-South West Africa, mOvenduka, ota ka efa oilonga youngoloneya moshilongo eshi meti 30 Septemba neudo. Inaku shiivifwa ota ka longa shike nopeni.

Osho yo inaku ningwa eshiivifo lasha kombinga yehovelo langoloneyandjai, omupanguli Steyn, ou a tumbulwa ta ka pangela South West mefimbo lopokati, kutya omefiku lilipi po.

TJONGARERO E SHI VA KUFILA MO

Okuhafimaneka oufemba womunhu muUganda, muRussia nomoilongo oyo haku tiwa oyopaudemokoli, hasho tashi yukipalifa edandakanifo nelyateloposhi loufemba womunhu muAfrica lokOumbuwanhu, osho omunashipundi wa SWAPO, omushamane Dan Tjongarero a lombwela oshoongalele shOraata yEengeleka muSouth Africa, puHammskraal omafiku a dja ko.

Omushamane Daniel Tjongarero oye oshilyo shOngeleka Onghwaevangeli paLuther yahangana muNamibia noku li omuwiliki wehangano SWAPO medu eli.

Omushamane Tjongarero ou a popya shihapu kombinga youfemba womunhu, okwa shiivifa ngehe SWAPO te ke lipyakidila noshinima shoufemba womunhu muNamibia la manguluka. Okwa ti okudja 1948 oufemba womunhu owa dongaulwa nai kepangelo la S.A. she likwatelela komakanghameno okatongotongo. Epangelo la SWAPO ota li ka amena oufemba womunhu mokuninga eeveta dihe na ndjoolola, notadi ka foloma omukanghaveta wa pama.

Ekufepo lomukundu pamihoko ole li kwatelela koubada weengudu dinini tadi pangele da tila okulamininwa po vati kudikwao ngeenge epangelo la i momake avahapu.

Ngeenge ongudu imwe ei tai pangele oya tili-fwa kepangelo lavahapu omolwomufika nomaufemba ayo, itashi ti eengudu adishe odi na oubada ou. Oufemba womunhu otau dulu okwaamenwa paeveta doufemba mepangelo lavahapu, osho omupopi ou a ti.

Okwa twikila ta ti SWAPO okwa itavela ngeno ku ningwe ohofa yopamukanghaveta i lipyakidile noinima oyo tai di meehofa dongaho, ina ekwatafano nefatululo lomukanghaveta neeveta doufemba womunhu.

Okwa ti yo kutya eameno loufemba womunhu itali xulile ashike moufikepamwe, ndele onghalo omo omukwashilongo keshe ta mono oshitukulwa moupuna waNamibia oyo i na okuhololwa po.

(The Star)

Eti 2 Aguste, manga iilyo yuungundu welaka (Oshindonga nOshikwanyama) inaaya tameka noshigongi shawo, oya li ya gongala ominute dhimwe mombeleva yOministeli yelongo pOndangwa. Mokathimbo haka ka sheywa, oministeli yelongo omusita Titus Heita, okwa pandula yatatu yomomapenda nomanyakwa melaka lyOshiwambo.

Oministeli oya tameke nomusamane T. E. Tirronen ngoka a longo oshindji melaka lyOshiwambo, unene tuu Oshindonga. Okwa holola nkene tatekulu Tirronen a kala i ipyakidhila nokuhumitha elaka lyOshiwambo komeho, nonando e li omulongi gwiilongwa yopau-nongononi. Otu na nokuli iinyolwa ye 42 melaka ndika, osho Heita a tumbula.

Pomimvo 1965-73 okwa kala oshilyo shOraata yelaka, noku li wo oshilyo shokangundu kelaka lyOshindonga, ye oye omupokati (coordinator) gwokangundu ketoloko lyOmbimbeli yOshindonga nEhanganombimbeli.

Pokathimbo haka omusamane Tirronen okwa pandulilwa unene embo lye "Oshindonga shetu" ndyoka a taamba paveta miikaha yoministeli. Embo ndika otali longithwa moosikola okuza pofooloma ontiyali sigo ontintano nokutya mOmatilika.

Ependa etiyali mokuhumitha ko elaka oye omusamane Gabriel Taapopi, ngoka Ombelewa yelaka ye mu tula mopensiune yuukulupe. Nguka okwa tumbalekelwa oshindji shoka a longo melaka lyOshikwanyama.

lilonga yokombelewa yelaka (Taalburo) kOvenduka okwe yi tamekele 1964, nokwa longo unene muutermnologi.

Omusamane Taapopi ke shi owala enyakwa melaka, ihe oye wo omutoti gwoondjimbo oombwanawa, ngashi hatu dhi imbi mehanganoyetu, "Kondjela ongerki yoye," nomakwawo ogendji.

Kelundululo lyOmbimbeli yOshikwanyama nako okwa pambulile ko ngaa. Oye oshilyo shokangundu kelaka lyOshikwanyama. Nonando ta vululukwa kiilonga yokOmbelewa yelaka, onkene ngaa ta tsikile natango niilonga yilwe mekwatathano nelaka.

Omupandulwa omutitatu oye omunyoli omupe nomugundjuka, Johannes Kwedhi, omulongwa mosikola yaNgwediva. Okwa nyola embo lyuuhokololo uufupi lyedhina "Shalongo" Naye wo okwe li taamba paveta miikaha yoministeli pamwe notjeke yooR350.00. Shika aniwa osha ningwa, opo a tsuwe omukumo a tsikile nokunyola, sho shi papudhule wo aagundjuka yoshigwana ya wape okwi itula mekokeko lyelaka lyawo.

OSTOLA YIIPUNDI YA ANDJAGANEKWA

OPWA DHIKWA ISHEWE OSHITAYI SHOSTOLA YIIPUNDI MEWILIKO LYOMUSAMANE ELIAKIM SHIIMI YA GWEDHELE KUNDJOKA YA KALA PONDJONDJO.

OSHITAYI SHIKA OSHITIYALI OSHI LI POKATI KONGWEDIVA NOSHAKATI, HAKOKULE UNENE NANAMBILI KOMBINGA YOKUUKWANYAMANTU WOPATE.

OWE SHI UVA TUU, MOSTOLA NDJOKA OTO VULU OKULANDA MO IINI-MA NGAASHI UUMBASKELA WAANONA, UUMBASKELA HAU NU OPETROLI, IHE OTO VULU WO OKUTHANGA NOOMPADHI NGELE INO HALA OKULONGITHA OPETROLI MOKWEENDA KWOYE.

OOMBETE, IIPUNDI YUUZEXO, OMASIPILI GOMOOSKOPA NOSHO GALWE OMO GE LI.

OOSKOPA DHOMOKOMBITHA NOSHO NDHOKA DHOKUTSILIKA OONGUYO ITO MANA. OOSKOPA DHOKUTALALEKA OMEYA NIINIMA YAAKULUNTU TADHI LONGITHA OMAHOOLI OMO TO DHI ADHA. INDA U KA TALE MWENE OKULOMBWELWA ITAKU ZI.

Oshoongalele shovanyasha moshitaingeleka shaUkwanyama mEndola 24-26.6.1977

Ovanyasha ova li va ongala ve fike po 350.

Oshoongalele osha li momhepo iwa. Pexulilo inapu holoka omapiyaano ngashi moyoongalele ikwao, omolwomakondjelo omapandela noma-holo omawinafano. Neudo ehola inali kondjela, ndele ovanhu ova imba ashike nombili nehafo.

Ebandela lOshitai olo hali kondjelwa paimaliwa, ola ya kovaNdola, eshi va ongela R168-87. Eshi osha li shi hafifa unene, osheshi inapa dja ovanhu va ninga eemwenyo dii.

Ohaku ningwa yo ongalo pamakondjelo, pokati kovamati noukadona, omolwoshihauto shovanyasha kumonike ou te ke shi shinga ngeenge omumati ile okakadona. Neudo osha li ngaha:

Oukadona R37-33
Ovamati R30-11
Kumwe R67-44

Noneudo ovamati ova dengwa koukadona.

Haiti vakwee — Makandangala — ombadje, Oikongi yongobe yaHaivinga; moukadona itaku nyanye mo vali. Fye omushingi wetu okakadona ashike. Walye tuu nge tamu shi itavele.

Vamenwoonye mu li kOlange, kOmbaye no-sho tuu, oshihauto shovanyasha otashi ka shingwa ngoo nee koukadonal Linyengeni vakwetu, tu landeni oshihauto shetu.

Omaongalo oo a li mo okwa li a hafela epopifo lomuprofeti meme Justina Haihambo. Naye omo a li moshoongalele nodimbo ya yelulwa pombada ta ti: "Ovanyasha efeni oikunwa, dulikeni kovakulunhu veni."

Omaongalo okwa ongela ngaha:

Endola	R168-87
Ongenga	114-32
Ohalushu	102-00
Engela	88-00
Ondobe	88-00
Onheleiwa	85-00
Olupandu	85-00
Eembaxu	85-00
Okalongo	85-00
Edundja	85-00
Okatope	85-00
Ongwediva	85-00
Engela Hosp.	85-00

Ev. F. Nakamwe

OMUKWETU

Oye oshifo shOngeleka Onkwaevangeli paLuther yomOwambokavango.

Oha nyanyangidhwa mOshinyanyangidho shOngeleka mOniipa.

Omukuluntu gwOmukwetu omumbisofi dr. Leonard Auala.

Amushanga gwOmukwetu omulongi Ambrosius W. Amutenja.

Ondando yOmukwetu komumvo, muAfrika R 2-00, kombanda yomafuta R 4-00.

Omambesitelo pamwe noondando naga tumwe kOmukwetu Oniipa, P/B. 2013 Ondangwa 9270

OWAMBOKAVANGO CHURCH PRESS
ONIIPA P/BAG 2013 ONDANGWA 9270